

ՔԱՀԱՆԱՅԱԿԱՆ ՁԵՌՆԱԴՐՈՒԹՅՈՒՆ ՄԱՅՐ ԱԹՈՌ ՍՈՒՐԲ ԷԶՄԻԱԾՆՈՒՄ

Դեկտեմբերի 9-ին Մայր Աթոռ Սուրբ Էջմիածնում տեղի ունեցավ քահանայական ձեռնադրություն: Սուրբ և Անմահ Պատարագի ընթացքում պատարագիչ Սրբազան Հոր՝ Գեղարքունյաց թեմի առաջնորդ Գերաշնորհ Ս. Մարկոս եպիսկոպոս Հովհաննիսյանի ձեռամբ երեք սարկավագներ ստացան քահանայական ձեռնադրություն և օծում:

Մարկոս Սրբազանը նորընծա քահանաներին վերանվանեց հոգևոր նոր անուններով. Գոռ սրկ. Գևորգյանը վերանվանվեց Ս. Հակոբ, Հակոբ սրկ. Մովսիսյանը՝ Ս. Արշեն, իսկ Արման սրկ. Երիցյանը՝ Ս. Մեսրոպ:

Ս. Պատարագի ընթացքին՝ «Ողջոյնի» պահին, Մայր Աթոռի միաբանները բարձրացան Սուրբ Խորան և շնորհավորեցին նորընծաներին:

Ձեռնադրությունից հետո Մարկոս Սրբազանը ուրախություն հայտնելով, որ Հայ Եկեղեցու անդաստանում սպասավորության կոչվեցին ևս երեք քահանաներ, իր պատգամն ուղղեց նորած քահանա Հայրերին: Սրբազան Հայրը անդրադառնալով հոգևորականի պատասխանատու առաքելությանը՝ հորդորեց՝ լցվել առաքինություններով ու հոգևոր շնորհներով, պատրաստ լինել յուրաքանչյուր նոր մարտահրավերի և անվտանգ ու խաղաղ հանգրվանի հասցնել իրենց վստահված հոգևոր հոտը:

Երեկոյան ժամերգությունից առաջ Մարկոս Սրբազանի գլխավորությամբ նորընծա քահանաներին Վեհարանում ընդունեց Ն.Ս.Օ.Տ.Տ. Գարեգին Բ Ծայրագույն Պատրիարք և Ամենայն Հայոց Կաթողիկոսը: Շնորհավորելով Մարկոս Սրբազանին՝ անդրանիկ քահանայական ձեռնադրության կատարման և նորընծաներին՝ քահանայանալու առիթով՝ Նորին Սրբությունն անդրադարձավ հոգևորականի բարձր և պատասխանատու կոչմանը, կարևոր ծառայությանը Հայ Եկեղեցու և հայ ժողովրդի կյանքում: Նորին Սրբությունը հորդորեց նորած քահանա Հայրերին՝ քառասնորյա շրջանը լավագույնս օգտագործել քահանայական սպասավորությանն իրենց հոգևոր պատրաստության համար: Վեհափառ Հայրապետը մաղթեց նրանց հաստատուն մնալ իրենց կոչման մեջ, չընկրկել դժվարությունների առջև, հավատքով ու համբերությամբ հաղթահարել դրանք, սիրով և նվիրումով ծառայել մեր ժողովրդին:

Մայր Աթոռում քառասնորյա պահեցողության շրջանն ավարտելուց հետո, Նորին Սրբության բարձր տնօրինությամբ նորած եկեղեցականները հովվական ծառայության կկոչվեն Հայաստանյայց Առաքելական Սուրբ Եկեղեցու թեմերում և Մայր Աթոռի տարբեր կառույցներում:

*ՄԱՅՐ ԱԹՈՌ ՍՈՒՐԲ ԷԶՄԻԱԾՆԻ
ՏԵՂԵԿԱՏՎԱԿԱՆ ՀԱՄԱԿԱՐԳ*

Տ. ԱՐՇԵՆ ՔԱՀԱՆԱ ՄՈՎՍԻՍՅԱՆ

(Ավագանի անունը՝ Հակոբ)

Ծնվել է 1982 թ. մարտի 16-ին Վանաձոր քաղաքում:

1989-1999 թթ. սովորել է Էջմիածնի Գրիգոր Նարեկացու անվան թիվ 2 միջնակարգ դպրոցում:

1999-2003 թթ. սովորել է Սևանի Վազգենյան Հոգևոր Դպրանոցում:

2003-2005 թթ. ուսումնառությունը շարունակել է Գևորգյան Հոգևոր Ճեմարանում:

2004 թ. դեկտեմբերի 25-ին՝ Ս. Ստեփաննոս Նախասարկավազի տոնին, ձեռամբ Ս. Եզրաս եպիսկոպոս Ներսիսյանի, ձեռնադրվել է սարկավազ:

2005 թվականից աշխատում է Վեհարանում որպես գործավար քարտուղար:

2007 թ. դեկտեմբերի 9-ին Սուրբ Էջմիածնի Մայր Տաճարում, ձեռամբ Գեղարքունյաց թեմի առաջնորդ Ս. Մարկոս եպիսկոպոս Հովհաննիսյանի, ձեռնադրվել է ամուսնացյալ քահանա:

Տ. ՀԱԿՈԲ ՔԱՀԱՆԱ ԳԵՎՈՐԳՅԱՆ

(Ավագանի անունը՝ Գոռ)

Ծնվել է 1978 թ. Արարատի մարզի Խոր Վիրապ գյուղում:

1985-1995 թթ. սովորել է տեղի միջնակարգ դպրոցում:

1994-2000 թթ. սովորել է Սևանի Վազգենյան Հոգևոր Դպրանոցում:

2000-2001 թթ. ուսումը շարունակել է Գևորգյան Հոգևոր Ճեմարանի Զ լսարանում:

2001 թ. հուլիսի 22-ին ձեռնադրվել է սարկավազ՝ ձեռամբ Գուգարաց թեմի առաջնորդ Ս. Սեպուհ եպս. Չուլջյանի:

2001 թ. ծառայության է նշանակվել Վեհարանում որպես սպասասրահի հյուրընկալ:

2002 թ. հունիսի 12-ին պաշտպանել է ավարտաճառ «Հովհաննես Գառնեցին և նրա մատենագրական ժառանգությունը» թեմայով:

2004-2005 թթ. ուսանել է Գերմանիայում՝ Ռեգենսբուրգի Արևելյան Եկեղեցիների ինստիտուտում:

Տ. ՄԵՍՐՈՊ ՔԱՀԱՆԱ ԵՐԻՑՅԱՆ

(Ավագանի անունը՝ Արման)

Ծնվել է 1978 թ. սեպտեմբերի 2-ին Գեղարքունիքի մարզի Արծվաշեն գյուղում:

1985-88 թթ. սովորել է Գեղարքունիքի մարզի Թթուջուր գյուղի միջնակարգ դպրոցում:

1988-1995 թթ. սովորել է Գեղարքունիքի մարզի Ճամբարակ քաղաքի թիվ 1 միջնակարգ դպրոցում:

1996 թ. ընդունվել է Սևանի «Մխիթար Մեբաստացի» համալսարանի պատմության ֆակուլտետ, որի լրիվ դասընթացը ավարտել է 2000 թ.՝ ստանալով պատմության ուսուցչի մասնագիտական որակավորում:

1998-99 թթ. աշխատել է Գեղարքունիքի մարզի Մարտունի գյուղի միջնակարգ դպրոցում որպես պատմության ուսուցիչ:

1999-2001 թթ. դասավանդել է Գեղարքունիքի մարզի Աղբերք գյուղի միջնակարգ դպրոցում:

2001 թ. մասնակցել է «Հայաստանի Պատանեկան նվաճումներ» և ՀՀ Կրթության և գիտության նախարարության կրթության բարեփոխումների կենտրոնի հետ համատեղ կազմակերպված «Մարդու իրավունքներ», «Քաղաքացիական կրթություն», «Պետություն և իրավունք» միացյալ դասընթացին՝ ստանալով իրավունքի ուսուցչի մասնագիտական որակավորում:

2001-2002 թթ. աշխատել է Գեղարքունիքի մարզի Ճամբարակ քաղաքի թիվ 4 միջնակարգ դպրոցում որպես պատմության և իրավունքի ուսուցիչ:

2002 թ. մասնակցել է «Քայլ առ քայլ» բարեգործական հիմնադրամի կողմից իրականացված «Քննադատական մտքի զարգացումը կարդալ-գրելու միջոցով» դասընթացին՝ ձեռք բերելով մանկավարժական նոր հմտություններ:



ՆՈՐԱՕԾ ՔԱՀԱՆԱՆԵՐԻՆ ՇՆՈՐՀԱՎՈՐՈՒՄ Է ՎԵՀԱՓԱՌ ՀԱՅՐԱՊԵՏԸ



ՆՈՐԱՕԾ ՔԱՀԱՆԱՆԵՐԻՆ ԻՐ ԽՈՍՔՆ Է ՈՒՂՂՈՒՄ
ՁԵՌՆԱԴՐՈՂ ՍՐԲԱԶԱՆ ՀԱՅՐԸ

ՈՒՍԺԵՐԹԵՂԵՂ ԳՈՅԹԱՍԵՆՈՒԹԵԼ ԳՈԿՈՅԵՆՈՒՆՈՒԹ
«ՀԱՄԱԲՈՒՄ»



2002-2003 թթ. սովորել է Վանաձորի Մարդու իրավունքների դպրոցում (Հայկական Սահմանադրական իրավապաշտպան կենտրոն)՝ ստանալով մարդու իրավունքների պաշտպանի մասնագիտական որակավորում:

2002-2005 թթ. ավարտել է Մայր Աթոռ Սուրբ Էջմիածնի քահանայից պատրաստման լսարանի եռամյա լրիվ դասընթացը:

2005-2007 թթ. հոգևոր սպասավորության է կոչվել Գեղարքունյաց թեմի Ճամբարակի տարածաշրջանում:

2005-2007 թթ. Հայ Եկեղեցու պատմություն և Հայոց պատմություն է դասավանդել Գեղարքունիքի մարզի Ճամբարակ քաղաքի «Հայ 93» վարժարանում:

2006 թ. աշխատել է Սևանի STV1 հեռուստաընկերությունում՝ որպես հեռուստալրագրող և հոգևոր հաղորդումների մեկնաբան:

2007 թ. հուլիսի 29-ին, ձեռամբ Գեղարքունյաց թեմի առաջնորդ Ս. Մարկոս եպս. Հովհաննիսյանի, ձեռնադրվել է սարկավագ:

2007 թ. ծառայության է կոչվել Գեղարքունյաց թեմի Ծաղկունքի Ս. Սարգիս և Ցամաքաբերդի Ս. Գևորգ եկեղեցիներում:

2007 թ. դեկտեմբերի 9-ին Սուրբ Էջմիածնի Մայր Տաճարում, ձեռամբ Գեղարքունյաց թեմի առաջնորդ Ս. Մարկոս եպիսկոպոս Հովհաննիսյանի, ձեռնադրվել է ամուսնացյալ քահանա:

Ամուսնացած է, ունի մեկ որդի: